

# Каноны о усопших восьми гласов

**Начало канона, общее для всех заупокойных канонов.**

## Канон, глас 6-й

### ***Песнь 1.***

*Ирмос:* Яко по суху пешешествовав Израиль, по бездне стопами, гонителя фараона видя потопляема, Богу победную песнь поим, вопияше.

**Припев: Дивен Бог во святых Своих, Бог Израилев (поклон).**

В Небесных Чертозах, всегда доблии мученицы молят Тя, Христе, ихже от земли преставил еси верныя, вечных благ получитьи сподоби.

**Покой, Господи, души усопших раб Твоих (поклон)<sup>1</sup>.**

Украшивый всяческая, животное смешенное мя человека, посреде смирения же вкупе и величества создал еси, темже раб Твоих души, Спасе, упокой.

*Слава:* Рая жителя, и делателя в начале мя учинил еси, преступивша же Твою заповедь изринул еси. Темже рабов Твоих души, Спасе, упокой.

*И ныне:* Иже от ребра создавый Еву первее, нашу праматерь, из пречистаго Твоего чрева в плоть одевается; еюже смерти крепость, Чистая, разрушил есть.

### ***Песнь 3.***

*Ирмос:* Несть свят, якоже Ты, Господи Боже мой, вознесый рог верных Твоих, Блаже, и утвердивый нас на камени исповедания Твоего.

**Дивен Бог во святых Своих, Бог Израилев.**

Законно пострадавшие Твои мученицы, Жизнодавче, и венцы победы украсившиеся от Тебе, прилежно преставльшимся верным вечное ходатайствуют почестие.

**Покой, Господи, души усопших раб Твоих.**

Наказав прежде многими чудесы и знаменьями мене, заблуждшаго, напоследок Самого Себе истощил еси, яко сострадателен, и, поискав, обрел и спасл еси.

*Слава:* От текущаго непостоятельна тли к Тебе пришедшая в селениях вечных вселиться радостно сподоби, Блаже, оправдав верою же и благодатию.

*И ныне:* Несть непорочны, якоже Ты, Пречистая Богомати, едина бо от века истиннаго Бога зачала еси во чреве, смерти разрушившаго силу.

---

<sup>1</sup> В 1-й и 9-й песнях припевы читаются с поклоном, в остальных – без поклона

Господи, помилуй (*трижды*).

### ***Седален, глас 6-й***

Воистинну суета всяческая, житие же сень и соние, ибо все мятется всяк земнородный, якоже рече Писание: егда мир приобретаем, тогда во гроб вселимся, идеже вкупе царие и нищии. Темже, Христе Боже, преставльшихся упокой, яко человеколюбец.

*Слава и ныне, Богородичен:* Всесвятая Богородице, во время живота моего не остави мене, человеческому предстательству не ввери мя, но Сама заступи и помилуй мя.

### ***Песнь 4.***

*Ирмос:* Христос моя сила, Бог и Господь, честная Церковь благолепно поет, взываящи, от смысла чиста о Господе празднующи.

**Дивен Бог во святых Своих, Бог Израилев.**

Премудрости большее являя познание и о дарех многосовершенство, Владыко, благостыню, мученическая лики Ангелом сочетал еси.

**Покой, Господи, души усопших раб Твоих.**

Пречистую славу Твою получить сподоби к Тебе преставленным, идеже, Христе, веселящихся есть жилище, и глас чистаго радования.

*Слава:* Поющая прими Божественною державою Твоею, ихже от земли прият, чада свету тех соделав, греховную мглу очищая, Многомилостиве.

*И ныне:* Приятелище пречистое, церковь непорочную, ковчег всевят, девственное место священства, Тебе, доброту Иаковлю, Владыка избрал есть.

### ***Песнь 5.***

*Ирмос:* Божиим светом Твоим, Блаже, утренующих Ти души любовью озари, молюся: Тя ведети, Слове Божий, истинного Бога, от мрака греховнаго взывающа.

**Дивен Бог во святых Своих, Бог Израилев.**

Яко всеплодие священное и яко начаток человеческого естества, мученицы, прославленному принесшися Богу, нам спасение присно ходатайствуют.

**Покой, Господи, души усопших раб Твоих.**

Небеснаго пребывания и раздаяния дарований сподоби, Господи, прежде усопшия верныя рабы Твоя, подавая прегрешений избавление.

*Слава:* Иже един естеством животворец, Иже благи воистинну неизследимая пучина, скончавшиися Царствия Твоего сподоби, Щедре, Едине Безсмертне.

*И ныне:* Крепость и пение, Иже из Тебе, Владычице, миру рождется, и спасение бысть погибшим, иже от адовых врат избавляя верою Тебе блажащия.

## **Песнь 6.**

*Ирмос:* Житейское море, воздвигаемое зря напастей бурею, к тихому пристанищу Твоему притек, вопию Ти: возведи от тли живот мой, Многомилостиве.

**Дивен Бог во святых Своих, Бог Израилев.**

На Кресте пригвождаем, мученические лики к Себе собрал еси, подобящийся Страсти Твоей, Блаже. Темже Тя молим: к Тебе преставленные упокой.

**Покой, Господи, души усопших раб Твоих.**

Неизреченною славою Твоею, егда приидеши страшно судити миру всему на облацех, благоволи, Избавителю, светло срести Тебе, яже от земли приял еси, верные рабы Твоя.

*Слава:* Источник жизни сый, Владыко, в мужестве Божественном, окованныя изводя рабы Твоя, яже к Тебе верно отшедшия, в пищи райстей всели.

*И ныне:* В землю возвратихомся, преступивше Божию заповедь; Тебе же ради, Дево, на небеса от земли вознесохомся, тлю смертную оттрясше.

Господи, помилуй (*трижды*). Слава и ныне.

## **Кондак, глас 8-й**

Со святыми упокой, Христе, души раб Твоих, идеже несть болезнь, ни печаль, ни воздыхание, но жизнь безконечная.

## **Икос**

Сам един еси Безсмертный, сотворивый и создавый человека; земнии убо от земли создахомся и в землю туюжде пойдём, якоже повелел еси создавый мя и рекий ми: яко земля еси и в землю отыдеши, аможе вси человецы пойдём, надгробное рыдание творяще песнь: аллилуия, аллилуия, аллилуия.

## **Песнь 7.**

*Ирмос:* Росодательну убо печь содела Ангел преподобным отроком, халдеи же опаляющее веление Божие, мучителя увеща вопити: благословен еси, Боже отец наших.

**Дивен Бог во святых Своих, Бог Израилев.**

Избавльшиися Твоею кровию мученицы первого преступления, окропившися же своею кровию, прообразуют яве Твое заклание; благословен еси, Боже отец наших.

**Покой, Господи, души усопших раб Твоих.**

Свирепеющую печь умертвил еси, Слове Живоначальнейший, в вере же Твоей усопшия приими, Тебе поющия, Христе, и глаголющия: благословен еси Бог отец наших.

*Слава:* Воодушив мя, человека, вдохновением Божественным, Богоначальнейший Владыко, преставленныя Царствия Твоего сподоби, пети Тебе, Спасе: благословен Бог отец наших.

*И ныне:* Превышши всех тварей, Пренепорочная, была еси, зачещи Бога, сокрушившаго смертная врата, и вереи<sup>1</sup> стершаго. Темже Тя, Чистая, песнословим, вернии, яко Богоматерь.

### ***Песнь 8.***

*Ирмос:* Из пламене преподобным росу источил еси, и праведнаго жертву водою попалил еси: вся бо твориши, Христе, токмо еже хотети. Тя превозносим во вся веки.

**Дивен Бог во святых Своих, Бог Израилев.**

Крепко подвиги показующе, победы венцы приясте, мученицы страстотерпцы, Христови зовуще: Тя превозносим, Господа, во веки.

**Покой, Господи, души усопших раб Твоих.**

Священно верная, житейская оставльшия и к Тебе, Владыце, отлучившиися, приими кротко и упокой, яко милосерд, Тя превозносящих Господа во веки.

*Слава:* Ныне на земли кротких всем водворятися прежде усопшим, Спасе, благоволи, верою Твоею оправдав и благодатию, Тя превозносящих, Господа, во веки.

*И ныне:* Блажим Тя вси, Преблаженная, яко Слово воистинну Сущее Блаженное Рождшую, плоть бывшее нас ради, Егоже превозносим во вся веки.

### ***Песнь 9.***

*Ирмос:* Бога человеком невозможно видети, на Негоже не смеют чини ангельстии взираи; Тобою же, Всечистая, явися человеком Слово воплощенно, Егоже величающе, с небесными вои Тя ублажаем.

**Дивен Бог во святых Своих, Бог Израилев.**

Надежда мучеников лики укрепи, и к Твоей любви распалением вperi, будущий сим предвообразивши непоколебимый воистинну покой; егоже преставленныя, Блаже, верная сподоби.

**Покой, Господи, души усопших раб Твоих.**

Светлое Твое, Христе, и Божественное улучшить сияние верою преставленным благоволи, иже в лонех Авраамовех покой, яко един милостив, тем даруя, и вечнаго сподобляя блаженства.

*Слава:* Иже сый естеством благ и милосерд, и хотитель милостей, и благоутробия пучина, иже от места сего озлобления и сени смертных преставил еси, идеже сияет Твой Свет, Спасе, тех учини.

*И ныне:* Сень святую, Чистая, вемы Тя, и ковчег, и скрижали, закона и благодати: Тебе бо ради оставление даровася, оправданным кровию

---

<sup>1</sup> Вереи – запоры, затворы

Воплощенного из Твоего чрева, Всенепорочная.

Достойно есть яко воистинну блажити Тя, Богородицу, присноблаженную и пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем (*поклон*).

**Окончание канона, общее для всех заупокойных канонов.**